



Datë: 18.11.2025
Numër Protokolli: 7489/2025

A.nr.1464/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, si dhe Avdyl Bekteshi, në cilësinë e procesmbajtësit, në procedurës sipas ankesës me numër A.nr.1464/2025, të datës 25.07.2025, të parashtruar nga ankuesja B.K, kundër organit të punësimit/Agjencia Kosovare e Privatizimit, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1, nenin 16, paragrafi 3 dhe nenin 18, paragrafin 1, nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 18.11.2025, mori këtë:

V E N D I M

I. Aprovohet si e bazuar ankesa A.nr.1464/2025, e datës 25.07.2025, e parashtruar nga ankuesja B.K, ashtu që, **detyrohet** Drejtori i Përgjithshëm në Agjencinë Kosovare të Privatizimit, që brenda afatit prej 15 ditësh nga dita e pranimi të këtij vendimi, të rishqyrtoj kërkesën e datës 07.04.2025 të parashtruar nga ankuesja dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësja civile B.K (*tutje referuar vetëm ankuesja*), më datë 25.07.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër heshtjes administrative të organit të punësimit në raport me kërkesën e datës 07.04.2025, për kategorizimit të pozitës së saj si Zyrtar Kadastral në kuadër të kategorisë së Specialistëve sipas Gradës dhe Hapit 4-4.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, ka proceduar kërkesën për përgjigje në ankesën e ankueses tek Agjencia Kosovare e Privatizimit, ndërsa, kjo e fundit ka dërguar përgjigjen në ankesë.

Kolegji i Këshillit pasi që ka shqyrtuar të gjitha shkresat e lëndës, ka konstatuar se meqenëse nuk është nxjerr akt administrativ lidhur me kërkesën e ankueses, atëherë, ekziston baza ligjore që të detyrohet Drejtori i Përgjithshëm në Agjencinë Kosovare të Privatizimit, të nxjerr aktin administrativ në pajtim me legjislacionin në fuqi lidhur me shqyrtimin e kërkesës së datës 07.04.2025 të parashtruar nga ankuesja, **sepse**:

Nga administrimi i shkresave të lëndës del se ankuesja sipas Akt Emërimit me numër Reference: 59/DKR 12 të datës 02.10.2023, është e punësuar në pozitën Zyrtar Kadastral, kategoria Specialist, klasa I11 dhe koeficienti 7, në Divizionin e Kadastrit, në kuadër të Agjencisë Kosovare të Privatizimit.

Tutje sipas shkresave të lëndës rrjedhë së ankuesja më datë 07.04.2025, ka parashtruar kërkesë tek Komisioni për Rishikim të Pagës në Agjencinë Kosovare të Privatizimit, përmes të cilës ka kërkuar që të bëhet korrigjimi i gradës dhe hapit nga ai aktual 5-8 në gradën dhe hapin 4-4, mirëpo, që ankuesja nuk ka marr përgjigje në kërkesën e saj.

Ankuesja në ankesën e parashtruar në Këshillin e Pavarur Mbikëqyrës për Shërbimin Civil të Kosovës, kundër heshtjes administrative të organit të punësimit karshi kërkesës së datës 07.04.2025, pretendon se edhe përkundër faktit që pozita e saj sipas akt emërimit është kategorizuar si Specialist dhe është e paraparë sipas Rregullore Nr. 05/2023 për Organizmin e Brendshëm dhe Sistematizimin e Vendeve të Punës por kjo nuk është reflektuar në Rregulloren Nr. 13/2023 për Ndryshimin dhe Plotësimin e Rregullores së Pagave të Agjencisë, sepse, aktualisht kjo pozitë është paraparë në gradën dhe hapin 5-8 e që duhet të parashihej në gradën dhe hapin 4-4. Kërkon që ankesa të aprovet, të obligohet Agjencia Kosovare e Privatizimit të korrigjoj kreacionin nga grada-hapi 5-8 në gradën-hapin 4-4, të kompensohet në mënyrë retroaktive nga hyrja në fuqi e Ligjit Nr. 08/L-196 për Pagat në Sektorin Publikë dhe të obligohet AKP të përditësoj Rregulloren Nr. 13/2023, duke e përshtirë këtë pozitë në kuadër të pozitave specifike deficitare në kategorisë e Specialistëve.

Kolegji i Këshillit ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, si dhe nenit 97 paragrafi 1 të këtij ligji, ku përcaktohet se: *1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative*, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me kërkesën e datës 07.04.2025, të parashtruar nga ankuesja, ngase, sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.

Kështu që, thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 25.07.2025, në kuptim të shkeljeve procedurale, dhe si rrjedhojë detyroj Drejtorin e Përgjithshëm të AKP-së që në respektim të dispozitave procedurale të shqyrtoj kërkesën e ankuesit të parashtruar më datë 11.04.2025, dhe të nxjerr akt administrativ në përputhshmëri me dispozitat ligjore në fuqi.

Këshillë juridike: Vendimi hyn në fuqi ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë–Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1464/2025

Avdyl BEKTESHI

Procesmbajtës

Ardita Haxhnikaj DEMI

Kryetare e Kolegjit

Vendimi i dërgohet:

- Ankueses B.K;
- Organit të punësimit: Drejtorit të Përgjithshëm dhe Udhëheqësit të Burimeve Njerëzore në AKP dhe
- Arkivit të KPMSHCK-së.